

Forse

Forse u sole avia amparatu à u tonu di piattà a so luce
daret' à un tendone

Forse l'acqua dicia à e mille surghjente di pudè dà la vita à
millaie di ghjente

Forse a terra avia in ella u furore chì m'ai datu tù ogni mane
à bon'ora

Forse n'aghju amparatu fole è parole ingir' à e to spalle
sempre aperte o bà

Forse l'ora serena avia una fine per fà nasce più belle l'ore
anderine

Forse u fustu finu di a mo zitellina avà scopre beatu una nova
matina

Forse chi a mo terra mi l'ai data tù sempre cusì sinceru
chjamendu mi o ciù

Forse chi a to voce avà hè cum'un filu ch'eo lasciu corre in
darnu daret' à tè o bà

Forse chi l'uceanu è u neru marosu sò quì per fà cappià u core
amurosu

Forse chi a tempesta è a bianca saetta sempre s'intricceranu
sempre mi l'ai detta

Forse chi a mo pelle hè fatta da a toia è chi pensendu à què
rinascerà a gioia

Forse chi a mo pena un hè in l'universu ch'è una goccia
sparsa a lacrima per tè

Diana Saliceti